



BOSNA I HERCEGOVINA
FEDERACIJA BOSNE I HERCEGOVINE
GRAD ZENICA

Broj: 02-11-14834-2/22
Zenica, 14.11.2022. godine

Na osnovu člana 33.,34. i člana 70. stav 1., 3. i 6. Zakona o javnim nabavkama („Službeni glasnik BiH“ broj: 39/14), člana 34. Statuta Grada Zenica (“Službene novine Grada Zenica” broj: 5/15), a u vezi sa Izvještajem konkursne Komisije za provođenje konkursa za izradu idejnog rješenja simbola Grada Zenica, broj: 11-11-14834-16/22 od 03.11.2022. godine, Gradonačelnik donosi:

ODLUKU O IZBORU

I

Usvaja se Izvještaj Konkursne komisije broj: 11-11-14834-16/22 od 03.11.2022. godine (formirane Rješenjem o imenovanju konkursne Komisije za provođenje konkursa za izradu idejnog rješenja simbola Grada Zenica, broj: 02-11-14834-1/22 od 07.07.2022. godine) u postupku javne nabavke – Konkurs za izradu idejnog rješenja simbola grada Zenica broj: 11-11-14834-8/22.

Proglašavaju se pobjednici – autori tri prvorangirana idejna rješenja simbola Grada Zenica i dodjeljuju nagrade kako slijedi:

Prva nagrada (10.000,00 KM) - rad pod šifrom M0306, autor Miran Kuduzović, BiH,

Druga nagrada (3.000,00 KM) - rad pod šifrom S1162, autor Muhamed Bajramović, BiH

Treća nagrada (2.000,00 KM) - rad pod šifrom S1202, autorski tim Asmir Šabić i Zulejha Šabić-Zatrić, BiH

II

Dodijeljene novčane nagrade će biti isplaćene nagrađenim autorima Konkursa na temelju uslova iz tenderske dokumentacije i nakon što ova Odluka postane konačna.

Nagrađeni radovi isplatom nagrade postaju vlasništvo raspisivača konkursa koje može koristiti u cijelosti ili djelimično.

Nagrađeni autori dužni su u roku od 5 dana od dana dostavljanja ove Odluke dostaviti ugovornom organu dokaz da nema smetnji za učešće u skladu sa članom 45. Zakona o javnim nabavkama, a kako je traženo tačkom 4. tenderske dokumentacije.

III

Konkursnom radu pod šifrom E3515, s obzirom na ukupno ostvareni zbir procentualno izraženih bodova, pilikom vrednovanja radova po svakom od kriterija utvrđenih projektnim zadatkom, nije mogla biti dodijeljena nagrada.

IV

Odluka stupa na snagu danom donošenja.



O b r a z l o ž e n j e

Odlukom o pokretanju postupka javne nabavke broj: 02-11-14834/22 od 07.07.2022. godine pokrenut je postupak nabavke. – Konkurs za izradu idejnog rješenja simbola Grada Zenica. Zakonski osnov za provođenje predstavlja član 33. Zakona o javnim nabavkama BiH („Službeni glasnik BiH“ broj: 39/14).

Za predmetni Konkurs Grad Zenica odredio je ukupni fond nagrada u iznosu od 15.000,00 KM i to:

- Prva nagrada u iznosu od 10.000,00 KM,
- Druga nagrada u iznosu od 3.000,00 KM i
- Treća nagrada u iznosu od 2.000,00 KM .

Grad Zenica je dana 23.08.2022. godine na Portalu javnih nabavki objavio obavještenje o nabavci broj: 1355-6-2-240-3-158/22, pod nazivom "Konkurs za izradu idejnog rješenja simbola Grada Zenica na raskrsnici na magistralnoj cesti M17".

Tenderska dokumentacija je dostavljena na ukupno 12 adresa, 11 putem e-mail-a i 1 lično preuzimanje u prostorijama Grada na način definisan u tenderskoj dokumentaciji. Na dan zatvaranja konkursa, 27.10.2022. godine do 16:00 sati na Protokol Grada Zenica zaprimljeno je šest blagovremenih ponuda.

Konkursna komisija je utvrdila da šest radova ispunjava uslove u pogledu opremljenosti rada, od čega četiri rada, u koverti sa oznakom "DOKAZI" sadrži sve dokaze precizirane tenderskom dokumentacijom,

Komisija je dalje utvrdila da dva (2) konkursna rada, nakon otvaranja koverta za oznakom "DOKAZI" sadrže nedostatke koji se ogledaju u sljedećem:

- Rad pod šifrom Z7200, u koverti "DOKAZI", a u svrhu dokazivanja prava na obavljanje profesionalne djelatnosti u skladu sa čl. 46. Zakona o javnim nabavkama, nije dostavio dokaz o registraciji u odgovarajućem profesionalnom ili drugom registru u zemlji u kojoj je registrovan, ili potvrdu nadležnog organa kojom se dokazuje njegovo pravo da obavlja profesionalnu djelatnost, stoga je isključen iz dalje evaulacije i ocjene konkursnih radova.
- Rad pod šifrom S3825, u koverti "DOKAZI", dostavlja prijavni obrazac u kojem se navodi fizičko lice kao autor djela, dok izjave po čl. 45. i čl. 52. dostavlja za pravno lice, zajedno sa ID brojem i poreznim brojem. S obzirom da je na prijavnim obrascu navedeno fizičko lice kao autor, učesnik konkursa je bio dužan da dostavi kao dokaz i ovjerenu kopiju lične karte, te izjave po čl. 45 i 52. potpisane od strane autora kao fizičkog lica, a ne pravnog, a što isti nije učinio, stoga je isključen iz dalje evaulacije i ocjene konkursnih radova.

S obzirom na navedeno radovi pod šiframa Z7200 i S3825, smatraju se nepotpunim i nisu bili predmetom daljeg razmatranja od strane Konkursne komisije.

Konkursna komisija je na zatvorenim sjednicama, održanim u periodu od 01.11.2022. – 03.11.2022. godine, izvršila pregled i ocjenu četiri konkursna rada po kriterijima utvrđenim Projektnim zadatkom, te je u donjoj tabeli dala prikaz ostvarenih bodova pojedinačno po kriterijima i njihov ukupan zbir, a na osnovu istog i poredak konkursnih radova.



BOSNA I HERCEGOVINA
FEDERACIJA BOSNE I HERCEGOVINE
GRAD ZENICA

poredak radova	radna šifra	ŠIFRA RADA	KRITERIJI				UKUPNO BODOVA
			1	2	3	4	
			25%	25%	25%	25%	
01	03	M0306	23%	25%	24%	24%	96%
02	04	S1162	24%	18%	15%	13%	70%
03	01	S1202	18%	19%	18%	12%	67%
04	02	E3515	12%	17%	14%	16%	59%

Komisija je o svom radu sačinila Zapisnik, koji je sastavni dio ove Odluke, a zatim je i dodijelila nagrade kako slijedi:

- **Prva nagrada (10.000,00 KM)** - rad pod šifrom M0306, autor Miran Kuduzović, BiH,
- **Druga nagrada (3.000,00 KM)** - rad pod šifrom S1162, autor Muhamed Bajramović, BiH
- **Treća nagrada (2.000,00 KM)** - rad pod šifrom S1202, autorski tim Asmir Šabić i Zulejha Šabić-Zatrić, BiH

Nakon završetka rada Konkursne komisije utvrđen je identitet autora četiri konkursna rada i to autora tri nagrađena rada, kao i identitet autora konkursnog rada koji nije nagrađen.

Na osnovu naprijed navedenog, donesena je Odluka kao u dispozitivu.

Pouka o pravnom lijeku


Protiv ove Odluke može se izjaviti žalba Uredu za razmatranje žalbi, putem ugovornog organa: Grad Zenica, Služba kabineta Gradonačelnika, Trg BiH br. 6, 72000 Zenica, u roku od 10 (deset) dana od dana prijema Odluke.

Žalba se podnosi u 3 (tri) primjerka, kako bi mogla biti uručena izabranom ponuđaču, Uredu za razmatranje žalbi i Ugovornom organu.

Žalba se podnosi neposredno Ugovornom organu u pisanoj formi.

DOSTAVLJENO:

- 6 x Učesnici konkursa
- 1 x Tenderska dokumentacija,
- 1 x Služba kabineta Gradonačelnika
- 1 x a/a



GRADONAČELNIK ZENICE

Fuad Kasumović